

## Messadi pertuccont il credit d'impegn per la sanaziun dalla Via S. Clau Sura, Glion


Preziau signur president dil parlament  
Stimadas parlamentarias, stimai parlamentararis

### Situaziun da partenza e finamira

La Via Sontga Clau Sura a Glion sesanfla en in schliet stan. La davosa sanaziun totala ei stada avon quater decennis. Muort il fundament insufficient ed in'aula frequenza da traffic ei la substantia vegnida donnegiada. Entochen il 2017 s'udeva il tschancun tier la reit dallas vias cantunalas. Cun l'aver-tura dil niev sviament Glion vest ha la vischnaunca surpriu quei tschancun.

El rom dalla procedura per la realisaziun da tempo 30 el territori dil marcau da Glion duei era la Via S. Clau vegnir integrada en quei perimeter. Quella mesira ei necessaria per risguardar las prescripziuns dalla protecziun encunter canera. El rom dalla sanaziun eis ei ulteriuramein previu da valorisar il sector sin l'altezia dall'ustria Lukmanier cun la cruschada Via la Lutta cun mieds sempels aschia che la qualitat da star sil tschancun dalla via sa vegnir augmentada sco pierti dallas immobilias. Per dapl qualitat per ils pedunzs vegn era l'extensiuin dallas arcadas sin la parcella nr. 90/91 a procurar, talas vegnan inte-gradas ella surbaghegiada planisada ed ein da finanziair dils patruns da construcziun.

Las lingias d'allontanar las auas da via ston vegnir renovadas e separadas dalla reit dall'aua piarsa. Il sistem da separaziun, ch'ei vegnius realisaus cun la sanaziun dalla Via la Lutta, sto ussa vegnir menaus vinavon ella Via S. Clau Sura entochen il prefluent. Las lingias d'aua piarsa en quei tschancun ein per gronda part en in bien stan. Perquei ein restauraziuns ed extensiuns mo per part necessarias. La lingia d'aua denter la Garascha Spescha e la Via la Lutta ei ina dallas veglias ella fracziun e sto vegnir rem-plazzada. Adattaziuns vid il passapei e las lingias communalas daventan era necessarias muort ina gronda surbaghegiada sin las parcelas nr. 90 e 91. Per quella surbaghegiada ei era ina colligiazion per calira a distanza necessaria. Quei pretenda ina nova lingia ella Via S. Clau Sura denter la Via la Lutta e la parcella nr. 91. La finfinala basegna la Repower in'extensiuin da sia reit da lingias en quei tschancun.



## Cuosts d'investiziun

Gener da lavur	Via	Aua tschuffa	Aua da beiber	Total
Project e direenziun da construcziun	65'000.00	9'000.00	10'000.00	84'000.00
Impressari	361'551.85	51'299.80	47'828.80	460'680.45
Sanitar			88'853.95	88'853.95
Catram	422'861.55	9'854.70		432'716.25
Different	74'786.60	6'845.50	15'067.25	97'449.35
<b>Total (incl. TPV)</b>	<b>924'200.00</b>	<b>77'750.00</b>	<b>161'750.00</b>	<b>1'163'700.00</b>

Il credit brut necessari per la sanaziun dalla Via S. Clau Sura a Glion munta a CHF 1'163'700 incl. taglia sin plivaleta. Per la via vegn ina procedura da perimeter menada atras.

## Lingias tecnicas da tiarzs

Las lavurs vid las lingias d'electricitad e las lingias per calira a distanza vegnan surpridas dalla Repower resp. dall'EWZ. Quellas muntan a strusch CHF 100'000.

## Finanziaziun

- Finanziaziun speciala providiment d'aua CHF 150'750
- Contribuziun GVG providiment d'aua (ca. 7 %) CHF 11'000
- Finanziaziun speciala providiment d'aua piarsa CHF 77'750
- Procedura da perimeter (schazegiau) CHF 270'000
- Mieds generals CHF 643'200

Las investiziuns nettas da CHF 643'200 vegnan amortisadas sur 40 onns.

## Etappaziun

La sanaziun dalla via vegn realisada en treis etappas annualas.



Per etappa duei la via tut tenor ladezia vegnir serrada totalmein ni parzialmein. Suenter il scarpar si suonda il remplazzament dallas lingias tecnicis cun lingia d'aua, lingia per calira a distanza, lingia d'al-lontanar las auas da via e lingias d'electricidad. Silsuenter succeda la cuvrada cun bishels avon che la rasada da fundament e la stresa da basa vegnan installadas. La cuvrada da catram vegn mintgamai installada suenter in temps da spetga da rodund in onn.

Cuosts dallas singulas etappas:

2021:	CHF	256'500.00
2022:	CHF	312'000.00
<u>2023:</u>	<u>CHF</u>	<u>595'200.00</u>
<b>Total</b>	<b>CHF</b>	<b>1'163'700.00</b>

Tenor art. 31 lit. d al. 1 dalla constituziun communal schai quella fatschenta ella cumpetenza dalla cuminonza dils votants all'urna. La votaziun corrispundenta ei previda ils 16 da matg 2021.

## Proposta

Sin fundament dallas explicaziuns precedentas fa la suprastanza communal las suandontas propostas al parlament communal per mauns dalla votaziun all'urna:

- per la sanaziun dalla Via S. Clau Sura, Glion, vegn in credit brut da CHF 1'163'700.00 incl. in'eventuala carischia concedius.
- eventualas contribuziuns da tiarzs vegnan deducidas.
- la suprastanza communal vegn autorisada da realisar la decisiun.

Ulteriuramein fa la suprastanza communal la suandonta proposta al parlament. Quella resta resalvada dall'approbaziun dalla cuminonza da votants all'urna:

- per l'etappa 2021 vegn in credit brut da budget da CHF 256'500 deliberaus.

*Ilanz/Glion, ils 9 da mars 2021*

*Suprastanza communal Ilanz/Glion*